



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu imprensa

Distritu Viqueque

11 Agostu 2014

**Estudante Eskola Públiku Númeru IV Setembru Viqueque husu Estadu halo
socializaun ba Lei Kontra Violénsia Doméstika**

Judicial System Monitoring Program (JSMP) liuhusi Unidade Peskizador Juridiku no Unidade Relasaun Públiku iha 7 Agostu 2014, fasilita treinamentu ba estudante sira iha Eskola Públiku Númeru IV Setembru, Distritu Viqueque.

Atividade ne'e ho objetivu atu kontinua haklaken inforamsaun legal liu-liu atu ajuda estudante sira bele hetan informasaun baziku kona-ba oinsa atu halo keisa no denuncia tuir prosesu sistema justisa formal ne'ebé aplika iha Timor Leste.

Estudante sira ne'ebé partisipa iha atividade treinamentu ne'e hamutuk ema nain 30, kompostu husi mane ema nain 15 no feto nain 15.

Materia iha treinamentu ne'e koalia kona-ba prátika justisa formal ne'ebé kobre asuntu direitus umanus, kodigu penal no prosesu penal ne'ebé vigor iha Timor Leste, klasifikasaun tipu kazu krime sira tuir lei aplikavel, inklui oinsa atu asesu ba justisa formal.

“JSMP hanoin katak treinamentu kona-ba asesu ba sistema justisa formal hanesan komitmentu ida husi JSMP hodi asegura publiku atarves hosi estudante sira bele iha koñesimentu baziku kona-ba oinsa bele prosesu kazu sira tuir sistema formal,” dehan Diretór ezekutivu JSMP, Luis de Oliveira Sampaio.

Vice Diretór Eskola Sekundaria Públiku Nú. IV Setembru Viqueque, Sr. Verissimo Márques da Silva, iha ninia intervensaun husu no aplea ba estudante sira hotu katak hanesan estudante, sira reprezenta sira nia eskola, tanba ne'e instituisaun fo konfiansa ba estudante sira ne'ebé eskola hili sira hodi partisipa no hatur hanesan prioridade ba atividade importante ne'e.

Sr. Márques subliña liu tan katak asuntu justisa ne'e asuntu ida ne'ebé importante no nu'udar fator determinante ida, se la iha justisa mak sei laiha paz no se laiha paz mós sei laiha desenvolvimentu.

Aliende ne'e, mós nia hanoin katak atividade ne'e importante tebes ba estudante sira, hodi nune'e estudante sira bele iha koñesimentu kona-ba prosedimentu legal, nune'e sira bele ajuda

no kontribui hasae konsensia publiku nian kona-ba oinsa bele prosesu kazu krime tuir sistema justisa formal.

Tanba ne'e dala ida tan nia husu ba estudante sira hotu atu labele lakon oportunidade importante ne'e tanba oportunidade hanesan ne'e nunka sei akontese ba dala rua.

Iha sesaun husu no hatan, estundante sira hotu ativu hodi hato'o perguntas no preokupasaun, liu-liu kestiona makas kona-ba número kazu krime violénsia doméstika ne'ebé ass iha fatin hotu-hotu. Tuir estudante sira nia hare katak antes Lei Kontra Violénsi Doméstia tama iha vigor número kazu violénsia doméstika ne'e menus, maibe depois lei ne'e aprova no implementa número violénsia doméstika ne'e aumenta.

Relasiona ho preokupasaun ne'e fasilitador/treinador sira esplika no klarifika katak situasaun ne'e hatudu sinál iha implementasaun Lei Kontra Violénsia Doméstika. Tanba mudansa ne'e hatudu katak publiku liu-liu vítima violénsia doméstika komesa konsiente katak violénsia doméstika ne'e nu'udar krime publiku no vítima sira iha direitu atu hetan protesau hosi estadu liu hosi politika lejislativu hanesan Lei Kontra Violénsia Doméstika ne'e no lei sira seluk.

Depoide rona tiha esplikasaun hosi JSMP, estudante sira foin hetan informasaun loloos no sira rekomenda ba JSMP atu kontinua halo atividade hanesan iha sira nia eskola tanba lora ida deit la suficiente hodi bele hatene didiak kona-ba materia sira ne'e. Sira mós husu ba Estadu atu promove atividade divulgasaun lei regularmente atu sosiedade bele kumpriende diak kona-ba lei foun sira ne'ebé eziste no la halo konfuzaun ba publiku.

Treinamentu ne'e remata ho entrega JSMP nia publikasaun hanesan komunikadu imprensa, sumáriu kazu sira no pamfletu kona-ba papel autór judisiáriu.

Atividade treinamentu ne'e realiza tanba hetan suporta orsamentu husi Justice Facility.

Atu hetan informasaun kle'an favor kontaktu direktamente:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

info@jsmp.minihub.org

telefone: 3323883/77295795

webiste: www.jsmp.tl

facebook www.facebook.com/timorleste.jsmp

twitter: @JSMPtl